

Untuk Terbitan Media  
11 Disember 2025

## **SIARAN MEDIA BERSAMA**

### **PERKESO BAYAR FAEDAH LEBIH RM140 JUTA KEPADA PEKERJA ASING DAN WARIS SEJAK 2019**

**KUALA LUMPUR:** Lebih RM140 juta bayaran faedah melibatkan kira-kira 48,000 kes tuntutan pekerja asing dilunaskan Pertubuhan Keselamatan Sosial (PERKESO) kepada pekerja serta tanggungan mereka sejak caruman mandatori dikuatkuasakan pada 1 Januari 2019.

Caruman LINDUNG Pekerja menerusi Akta Keselamatan Sosial Pekerja 1969 (Akta 4) melibatkan lebih dua juta pekerja asing di Malaysia, sekali gus membolehkan PERKESO menyalurkan perlindungan dan faedah secara berterusan.

Ketua Setiausaha Kementerian Sumber Manusia (KESUMA), Datuk Azman Mohd Yusof berkata, angka LINDUNG Pekerja menerusi Akta Keselamatan Sosial Pekerja 1969 (Akta 4) itu jelas menunjukkan keselamatan sosial bukan sekadar keperluan undang-undang, tetapi nadi kelangsungan sosioekonomi yang membantu pekerja asing dan keluarganya.

“Begitupun, masih terdapat majikan yang gagal mendaftarkan pekerja asing atau membuat caruman untuk mereka, menyebabkan pekerja tidak menerima bantuan sewajarnya apabila ditimpa kemalangan.

“Justeru, menerusi Akta 4, PERKESO menjalankan penguatkuasaan tegas untuk mengenal pasti majikan yang gagal mendaftar dan mencarum pekerja asing mereka.

“Majikan yang disabitkan kesalahan boleh berdepan denda, hukuman penjara atau kedua-duanya sekali. Mesej kami adalah jelas, keselamatan sosial untuk pekerja asing adalah kewajipan undang-undang dan juga tanggungjawab moral,” katanya.

Beliau berkata demikian ketika menyampaikan ucapan sempena program “*A Shared Vision For Foreign Worker Social Security Protection In Malaysia Luncheon With PERKESO 2025*”, di sini, hari ini.

Pada program sama, Azman turut menyempurnakan pelancaran *MyPERKESO Induction Course*, sebuah modul pembelajaran digital komprehensif yang dibangunkan bagi meningkatkan kesedaran keselamatan sosial dalam kalangan pekerja asing di Malaysia.

Modul secara talian yang dibangunkan melalui kerjasama strategik antara PERKESO dan CIDB Holdings Sdn Bhd itu bertujuan meningkatkan literasi berkaitan keselamatan sosial kepada pekerja asing sebelum mereka memulakan pekerjaan di Malaysia.

Modul tersebut akan memperkenalkan fungsi PERKESO, menjelaskan perlindungan di bawah Skim Bencana Pekerjaan dan Skim Keilatan, selain menyenaraikan faedah yang tersedia untuk pekerja asing dan menerangkan peraturan yang perlu dipatuhi majikan.

Turut hadir pada majlis tersebut ialah Pengerusi Lembaga PERKESO, Dato' Sri Subahan Kamal; Pengerusi CIDB Holdings Sdn Bhd, Zainora Zainal; Ketua Pegawai Eksekutif Kumpulan PERKESO, Dato' Sri Dr Mohammed Azman Aziz Mohammed dan Ketua Pegawai Eksekutif CIDB Holdings Sdn Bhd, Supian Musa.

Selain itu, pemeteraian Memorandum Perjanjian (MoA) diadakan sebagai komitmen lebih kukuh antara PERKESO dan CIDB untuk menjadikan pendidikan keselamatan sosial sebagai komponen utama ekosistem pekerja asing di Malaysia.

Sementara itu, Pengerusi CIDB Holdings, Zainora menzahirkan sokongan terhadap kepimpinan PERKESO dalam memajukan agenda perlindungan buruh negara.

“Sebagai pemain utama sektor pembinaan, organisasi itu menegaskan komitmennya untuk bekerjasama dalam inisiatif yang mempromosikan amalan buruh berstruktur, bertanggungjawab dan mampan.

“Menerusi *MyPERKESO Induction Course*, CIDB Holdings melihat ia sebagai platform pemudah cara penting untuk meningkatkan kesedaran dan perlindungan pekerja asing,” katanya.

**##TAMAT##**

### **Mengenai LINDUNG**

**LINDUNG** ialah penjenamaan semula skim perlindungan keselamatan sosial PERKESO yang dilancarkan pada 22 Ogos 2025 sebagai langkah strategik memperkukuh peranan dalam melindungi rakyat. Pendekatan ini lebih segar, inklusif, mudah diingat dan berimpak tinggi bagi menyampaikan mesej perlindungan sosial secara meluas dan berkesan. Ia bertujuan memperluas capaian, meningkatkan kesedaran serta memperkukuh kepercayaan rakyat terhadap PERKESO sebagai pelindung utama keselamatan sosial. Di bawah penjenamaan ini, Akta 4 dikenali sebagai **LINDUNG PEKERJA**, Akta 800 sebagai **LINDUNG KERJAYA**, Akta 789 (SKSPS) sebagai **LINDUNG KENDIRI**, dan Akta 838 (SKSSR) sebagai **LINDUNG KASIH**. Maklumat lanjut di [www.perkeso.gov.my](http://www.perkeso.gov.my).

**Untuk pertanyaan media, sila hubungi**

**Iklil Fatihah Kamal Redzuan**  
**+6019-3273193**  
[fatihah.redzuan@perkeso.gov.my](mailto:fatihah.redzuan@perkeso.gov.my)

**Nurulain Hamzah**  
**+603-6206 0000**  
[nurulain@cidbh.com.my](mailto:nurulain@cidbh.com.my)

**Ridauddin Daud**  
**+6019-3265772**  
[ridauddin.daud@perkeso.gov.my](mailto:ridauddin.daud@perkeso.gov.my)

**Muhammad Idzuan Hafifi Ahmad Shabri**  
**+603-6206 0000**  
[idzuan@cidbh.com.my](mailto:idzuan@cidbh.com.my)